

NÜXĨRAÛXÛ GA POPERA GA CUÁÛ ÛMATÛXÛ

Ore i tũxũ maxẽẽxũchiga

¹ Pexcèx tanaxũmatũ nachiga ya Tupana Nane ya Cristu ya yima woetama marũ nüxĩra yexmacũ ga yexguma noxritama tauta naãne ùxgu. Rũ nüma rũ Ore i Maxẽẽẽruũ nixĩ i naega erũ nüma nixĩ i tamaã nüxũ yaxuxũ i Tupanachiga rũ tũxũ namaxẽẽẽxũ. Rũ toma ga norũ ngúexũgũ na tixĩgũxũ, rũ nüxũ taxĩnüẽ rũ toxetũmaã nüxũ tadaugũ rũ toméxmaã nüxũ tingõgũgũ. ² Rũ yima Maxẽẽẽruũ ya Cristu rũ toxũ nügũ nawéx. Rũ nüxũ tadaugũ rũ duũxũgũmaã nüxũ tixu na ñuxãcü yĩxũ. Rũ ñuxma rũ pemaã rũ ta nüxũ tixuchiga ya yima Cristu ya tũxna naxãcü i maxũ i taguma gũxũ. Rũ noxri rũ Nanatũxũtawa nayexma, natürũ ñoma ga naãnewa nangu rũ toxcèx nangox. ³ Rũ yema toma nüxũ tadaugũxũ rũ nüxũ taxĩnüẽxũ rũ pemaã nüxũ tixu na tomücũgũ pixĩgũxũcèx, ngẽxgumarũũ i toma na Tanatũ ya Tupana rũ Nane ya Ngechuchu ya Cristumücũgũ tixĩgũxũrũũ. ⁴ Rũ ngẽmacèx pexcèx tanaxũmatũ i ñãã ore na wũxigu aixcũmaxũchi itaẽgũxũcèx.

Ñoma ngóonexũrũũ name ya Tupana

⁵ Rũ ñãã nixĩ ga ore ga tomaã nüxũ yaxuxũ ga Ngechuchu ya Cristu. Rũ pemaã nüxũ tixu na ñoma ngóonexũrũũ namexũ ya Tupana, rũ nawa rũ nataxuma i chixexũ i ñoma ããnexũrũũ ixĩxũ, rũ bai i íraxũ. ⁶ Rũ ngẽxguma chi:

“Tanatü ya Tupanamücügü tixĩgü”, ñagügu, natürü chixri imaxëgu, rü tidoraemare erü tama aixcüma meã tamaxë. ⁷ Rü ngëxguma chi Tupanariüü ngóonexüwa imaxëgu, rü yigümücügü tixĩgü i yixema, rü Tupana Nane ya Ngechuchu rü nagümaã tüxü inayanatauxëë i guxüma i tórü chixexü. ⁸ Ngëxguma chi nüxü ixuxgu rü:

“Changearü pecaduãx”, ñagügu, rü yigütama tawomüxëë, rü tidoraemare. ⁹ Natürü ngëxguma chi Tupanamaã nüxü ixuxgu i tórü pecadugü, rü nüma tüxü nüxü nangechaü rü tüxü inayanatauxëë i guxüma i tórü chixexü, erü nüma rü mecü nixĩ rü taguma tüxü nawomüxëë. ¹⁰ Natürü ngëxguma chi:

“Tangearü pecaduãxgü”, ñagügu, rü doratèx nüxü tawogü ya Tupana rü tama aixcüma tawa nangëxma i norü ore.

2

Cristu rü tórü chogüruü nixĩ

¹ Pa Chauxacügüx, pexcèx chanaxümatü i ñaã ore na tama chixexü pexügüxücèx. Natürü ngëxguma chi wüxie chixexü üxgu, rü nangëxma ya tümaetüwa chogücü nüxna ya Tanatü ya Tupana na tama tüxü napoxcuxücèx. Rü yima nixĩ ya Ngechuchu ya Cristu ya aixcüma mecü ixĩcü. ² Rü guma Ngechuchu ya Cristu rü nügü inaxã rü nayu na naxütanüãxücèx ga tórü pecadugü. Rü tama tórü pecadugüxicatama naxütanü, natürü guxüma i duüxügüarü pecadugü ta naxütanü. ³ Rü ngëxguma chi naga ixĩnüëgu i ngëma tüxü namuxü ya Tupana, rü nüxü tacuèx na aixcüma nüxü icuáxü. ⁴ Rü ngëxguma chi wüxie:

“Choma rü Tupanaxü chacuèx”, ñagügu, natürü tama naga taxĩnügu i ngëma tüxü namuxü ya Tupana, rü wüxi

i doratèxáxũ tixĩ. ⁵ Natürü yíxema naga ñnuxê i ngêma tũxũ namuxũ ya Tupana, rü aixcũmaxũchi Tupanaxũ tangechaũ. Rü ngêmawa nüxũ tacuèxgü na aixcũma Tupanaãrũ duũxũgü ixĩgũxũ. ⁶ Rü yíxema:

“Tupanaãrũ duũxũ chixĩ”, ñagũxe, rü name nixĩ na meã tamaxũxũ yema Ngechuchu ya Cristu meã maxũxũrũũ.

Tupanaãrũ mu i ngexwacaxũxũchiga

⁷ Pa Chaueneëgũx, tama wũxi i ngexwacaxũxũ i Tupanaãrũ mu nixĩ i pexcèx chaxũmatũxũ. Natürü ñããtama noxriarũ ügũgumama pexũ yexmaxũ ga mu nixĩ. Rü ñããtama nixĩ i Tupanaãrũ mu ga nuxcũmaũxũ ga marũ nüxũ pexĩnüëxũ. ⁸ Natürü ñãã Tupanaãrũ mu i pexcèx chaxũmatũxũ rü guxũguma nangexwacaxũ. Rü ngëxguma naga pexĩnüëgu i ñãã Tupanaãrũ mu na pegü pengechaũgũxũ, rü tama ëãnexũwatama pemaxê, natürü Cristurũũ ngêma ngóonexũ i aixcũma ixĩxũwa pengëxmagü. ⁹ Rü ngëxguma chi wũxie:

“Choma rü ngêma ngóonexũwa changëxma”, ñagũgu, natürü tũmaëneëchi taxaixgu, rü ëãnexũwatama tangëxma. ¹⁰ Yíxema tũmaëneëxũ ngechaũxê rü ngóonexũwa tamaxũ, rü taxucèxma tũxcũũ pecadu taxü. ¹¹ Natürü yíxema tũmaëneëchi aixe, rü ëãnexũwatama tamaxũ, rü ëãnexũgu tixũ. Rü tama nüxũ tacuèx na ngextá taxũxũ, erü tũmacèx naxëãne. ¹² Pa Chauxacũgũx, pexcèx chanaxũmatü erü Cristugagu Tupana marũ pexũ nüxũ nangechaũ i perü pecadugü. ¹³ Pa Papágũx, pexcèx chanaxũmatü i ñãã ore erü nüxũ pecuèxgü ya Tanatü ya Tupana ga noxriarũ ügũgumama yexmacü. Pa Ngextũxücũgũx, pexcèx chanaxũmatü erü marũ nüxũ perüyexera i ngêma ngoxo i Chataná i chixexũãrũ

üruũ. ¹⁴ Pa Buxũgũx, pexcèx chanaxümatü erü marü nüxũ pecuèxgü ya Tanatü ya Tupana. Pa Papágũx, pexcèx chanaxümatü erü marü nüxũ pecuèxgü ya Tanatü ya Tupana ga noxriarü ügügumama yexmacü. Pa Ngextüxcügũx, pexcèx chanaxümatü erü peporae, rü guxũguma peãẽwa nangẽxma i Tupanaãrü ore, rü marü nüxũ perüyexera i ngẽma ngoxo i Chataná i chixexũãrũ üruũ. ¹⁵ ;Tãxú i pexũ nangúchaũxũ i ñoma i naãne rü norü ngẽmaxũgü! Ngẽxguma chi texéaxú nangúchaũgu i ñoma i naãne rü tama Tanatü ya Tupanaxũ tangechaũ. ¹⁶ Erü guxũma i ngúchaũgü i ñoma i naãnewa ngẽxmaxũ rü ñoma i naãneãrütama nixĩ rü tama Tupanaãrü nixĩ. Rü ngẽma ngúchaũgü rü ngẽma nixĩ i taxüneãrũ ngúchaũgü, rü taxetüarü ngúchaũgü, rü yigü na icuèxüũgũxũ tórü ngẽmaxũgümaã. ¹⁷ Natürü ñoma i naãne rü guxũma i ngúchaũgü i nawa ngẽxmaxũ rü tá nagux. Natürü yixema Tupanaga ñnuxẽ rü guxũgutáma tamaxũ.

Ore i aixcüma ixixũchiga rü ore i dora ixixũchiga

¹⁸ Pa Chauxacügũx, paxa tá nagux i ñoma i naãne. Pema rü marü nüxũ pexĩnũchiga rü tá ínangu i wüxi i Cristuarü uwanü, natürü marü ínangugü i muxũma. Rü ngẽmawa nüxũ tacuèx na marü nagúxchaũxũ i ñoma i naãne. ¹⁹ Rü ngẽma Cristuarü uwanügü rü tatanüwatama nangẽxmagüchiréx, natürü tama aixcüma tatanüxũ nixĩgü, erü ngẽxguma chi tatanüxũ yixĩgügu rü tatanügu chitama narücho. Natürü marü tatanüwa ínachoxũ na meãma nüxũ icuáxüçèx na tama aixcüma tatanüxũ yixĩgũxũ. ²⁰ Natürü pema rü Cristu marü pexna nanamu i Naãẽ i Üünexũ, rü ngẽmacèx meãma nüxũ pecuèx i Tupanaãrü ore. ²¹ Rü ñuxma rü tama nixĩ na

tama nüxũ pecuáxũcèx na pexcèx chaxümatüxũ. Natürü pexcèx chanaxümatü erü marü meãma nüxũ pecuèx i ngẽma ore i aixcüma ixĩxũ. Rü nüxũ pecuèx rü ngẽma ore i aixcüma ixĩxũwa rü nataxuma i dora. ²² ¿Texé tíxũ ya yíxema idoratèxáxe? Yíxema:

“Ngechuchu rü tama aixcüma Cristu ya Tupana Nane nixĩ”, ñagüxe, tixĩ ya idoratèxáxe. Yíxema tixĩ ya Cristu- arü uwanü, erü tama nüxũ tacuáxchaũ ya Tanatü ya Tupana rü Nane ya Ngechuchu. ²³ Guxãma ya yíxema tama nüxũ cuáxchaũxê ya Tupana Nane ya Ngechuchu, rü tama nüxũ tacuáxchaũ ta ya Tanatü ya Tupana. Natürü yíxema Ngechuchuxũ yaxóxê, rü Tanatü ya Tupanaãxũ rü ta tayaxõ. ²⁴ Rü ngẽmacèx name nixĩ i peyaxõgüama i ngẽma ore ga noxri nüxũ pexĩnüèxũ. Rü ngëxguma peyaxõgüamagu i ngẽma ore ga noxri nüxũ pexĩnüèxũ, rü aixcüma norü duũxügü pixĩgü ya Tanatü ya Tupana rü Nane ya Ngechuchu. ²⁵ Rü nümatama ya Ngechuchu ya Cristu nixĩ i tamaã inaxunetaxũ na tüxna naxããxũcèx i maxũ i taguma gúxũ. ²⁶ Nangëxma i duũxügü i chix- exũwa pexũ gagüchaũxũ. Rü ngẽmachiga nixĩ i pexcèx chanaxümatüxũ i ñãã ore. ²⁷ Natürü pema rü marü Cristu pexna nanamu i Naãë i Üünexũ, rü guxũguma pewa nangëxma. Rü ngẽmacèx tama penaxwèxe i to i perü ngúexêxũ erü nümatama i Naãë i Üünexũ rü pexũ nangúexêë i guxũma. Rü norü nguxêëtae rü aixcüma nixĩ rü tama dora nixĩ. Rü ngẽmacèx name nixĩ na guxũguma Cristuaxũ peyaxõgüxũ, ngẽma Naãë i Üünexũ pexũ ngúexêëxũãcüma. ²⁸ Rü ñuxmax, Pa Chauxacügüx, rü name nixĩ na meãma Cristuaxũ peyaxõgüxũ na tama nüxũ imuũèxũcèx, rü tama ixãneèxũcèx napéxewa i

ngëxguma wena nuã naxũxgu. ²⁹ Pema nüxũ pecuèx na Cristu rü aixcüma mecü yĩxũ. Rü ngëxgumarũü ta name nixĩ na nüxũ pecuáxũ na guxũma i duũxũgü i mexũ ügüxũ rü Tupanaxãcügü na yixĩgüxũ.

3

Tupanaxãcügüchiga

¹ ¡Dücèx, Pa Chaueneëgüx, ñuxãcü poraãcü tüxũ nangechaũ ya Tanatü ya Tupana! Rü ngëmacèx nixĩ i naxãcügümaã tüxũ naxuxũ i nümax. Rü aixcüma naxãcügü tixĩgü. Rü ngëmacèx ñoma i naãnecũãx i duũxũgü rü tama tüxũ nacuáxchaũ erü Tupanaxũ rü ta tama nacuáxchaũgü. ² Pa Chaueneëgü ya Pexũ Changechaũgüxe, ñuxma rü marü Tupanaxãcügü tixĩgü woo tama tüxũ nüxũ nacuèxëë na ñuxãcü tá ixĩgüxũ i yixcüra. Natürü nüxũ tacuèxgü na Ngechuchurũü tá ixĩgüxũ i ngëxguma nangoxgu, erü tá nüxũ tadaugü na ñuxãcü yĩxũ i nümax. ³ Rü guxãma ya yixema yaxóxë na Ngechuchurũü tá tiixũ, rü tügüna tadau na Ngechuchu ya Cristurũü aixcüma Tupanapëxewa tamexũ. ⁴ Natürü guxãma ya yixema pecadu üxe, rü Tupanamaã chixexũ taxü. Erü ngëxguma tama Tupanaga taxĩnügu, rü tapecaduãx. ⁵ Pema nüxũ pecuèx rü Ngechuchu ya Cristu rü ñoma ga naãnewa naxũ na iyanaxoxëëãxũcèx i tóru pecadugü. Rü nüma rü taguma pecadu naxü. ⁶ Rü ngëmacèx guxãma ya yixema aixcüma nüxũ yaxögüxe, rü tama pecadu taxügüecha. Natürü guxãma ya yixema pecadu üechaxe, rü ngëmaãcü tamaxë erü taguma Cristuxũ tadau, rü taguma nüxũ tacuèx. ⁷ Pa Chauacügüx, ¡täxú i naga pexĩnüëxũ i ngëma duũxũgü i pexũ

iyarütauxexêêchaũũ! Yíxema mexũ úxe rü aixcüma mecü tixĩ, ngëxgumarüũ ya Cristu na aixcüma mecü yiĩxürüũ. ⁸ Natürü yíxema pecadu üechaxe rü ngëmawa tüxũ tacuèx na Chatanáãrü duũxũ tĩxũ, erü nüma i Chataná rü noxriarü ügügumama pecadu naxüecha. Rü yemacèx ga Tupana Nane rü ñoma ga nañewa naxũ na iyanaxoxêêãxücèx ga yema Chataná üxũ. ⁹ Rü yíxema Tupanaxãcü ixixê rü tama pecadu taxüecha, erü naxãcüxüchi tixĩ. Rü taxuacüma pecadu taxüecha erü Tupana nixĩ ya tümanatü. ¹⁰ Yíxema chixexũ úxe rü tümañeñechi aixe, rü tama Tupanaxãcü tixĩ. Rü ngëmawa nüxũ tacuèx na texé tixĩgüxũ ya Tupanaxãcügü rü texé tixĩgüxũ ya Chatanáxãcügü.

Name nixĩ na yigü ingechaũgüxũ

¹¹ Rü yexguma noxritama pexũ tangüexêegu, rü pema nüxũ tixu na guxãma yigü ingechaxũgüxũ. ¹² Rü tama tanaxwèxe na Caírüũ ngoxo i Chatanáxãcü ixĩgüxũ. Yerü nüma rü nañeñexũ nimèx. ¿Rü tacücèx nixĩ ga yamáãxũ? Nayamèx yerü yema nüma naxüxũ rü tama name, rü yema nañeñê üxũ rü name. ¹³ Pa Chaueneëgüx, jtãxũ i pebaixãchiãëgüxũ ega pexchi naxaiegu i ñoma i nañecũãx i duũxũgü! ¹⁴ Yixema rü marü nüxna ítangüxũ i ngëma yu rü ñuxma rü marü maxũwaama tangëxmagü. Nüxũ tacuèxgü i ngëma erü nüxũ tangechaũgü i taeneëgü. Yíxema tama tümañeñexũ ngechaũxê rü yuwatama tangëxma. ¹⁵ Rü yíxema tümañeñechi aixe rü wüxi i máetaxürüũ tixĩ. Rü pema nüxũ pecuèxgü i wüxi i máetaxũ rü nüxũ nataxuma i norü maxũ i taguma gúxũ. ¹⁶ Rü Ngechuchu ya Cristu rü tórü pecaducèx nayu, rü yemaãcü tüxũ nüxũ nadauxêê i ngëma ngechaũ i aixcüma ixixũ. Rü

ngëxgumarüü ta i yixema, rü tanaxwèxe na ímemarexü na nüxü rüngüxëëxü i taeneëgü woo ngemagu iyuxgu.

¹⁷ Natürü ngëxguma chi wüxi i yatüäxü nangëxmagu i muxüma i norü ngëmaxügu, rü chi nüxü nadëuxgu i namücü na nüxü nataxuxü, rü taxuacüma:

“Choma rü Tupanaxü changechaü”, ñanagürü, ega tama nüxü nangüxëëgu i namücü. ¹⁸ Pa Chauxacügüx, tama name i taëxmaã rü tórü oremaäxicatama nüxü tangechaü i taeneë. Natürü tanaxwèxe i tórü maxümaã rü tórü ü i mexümaã nüxü tangechaü.

Tama taxãneë na Tupanana ingaicamagüxü

¹⁹⁻²⁰ Rü ngëxguma aixcüma yigü ingechaügügu, rü nüxü tacuèx na aixcüma naga ixĩnüëxü i ngëma ore i aixcüma ixixü, rü Tupanapéxewa rü aixcüma naxácügü ixigüxü, woo ngëxguma taãëwa nagu rüxĩnügu rü:

“Tama Tupanaxäcü chixi”, ñagügu. Erü nüxü tacuèx rü Tupana nixi i taãëärü yexera, rü nüma nüxü nacuèx i guxüma. ²¹ Pa Chaueneëgü ya Pexü Changechaügüxex, ngëxguma taãëwa nüxü icuèxgu na Tupanaxäcüxüchi ixigüxü, rü tama taxãneë na nüxna ingaicamagüxü ya Tanatü ya Tupana. ²² Rü nüma tá tüxna nanaxã i guxüma i tacü i naxcèx íçaxü erü naga taxĩnüë i ngëma tüxü namuxü rü tanaxü i ngëma nüma namaã nataãëxü. ²³ Rü nüma tüxü namu na Nane ya Ngechuchu ya Cristuaxü yaxögüxü rü yigü ingechaügüxü, yema nüma tüxü namuxüäcü. ²⁴ Rü yixema naga ñnüëxë i ngëma Tupana tüxü muxü, rü aixcüma Tupanaärü duüxügü tixigü rü nüma ya Tupana rü aixcüma tümawa namaxü. Rü ñuxma rü nüxü tacuèx na aixcüma Tupanaärü duüxügü ixigüxü rü tawa

namaxũxũ, erũ Naãẽ i Üünexũ ga tũxna namuxũ tũxũ
nũxũ nacuèxẽẽ.

4

Yíxema tũxũ nangẽxmaxẽ i Tupanaãẽ i Üünexũ rü
yíxema tũxũ nangẽxmaxẽ i Cristuarü uwanüãẽ

¹ Pa Chaueneëgü ya Pexũ Changechaũgũxex, ¡Tãxü i
nũxũ peyaxõgũxũ i guxũma i orearü uruũgü i nügü ix-
ugũgũxũ na aixcũma Tupanaãrũ orearü uruũgü yixĩgũxũ!
Natürü name nixĩ i penangugü i norü ore na nũxũ
pecuáxũcèx ngoxita aixcũma Tupanaãẽ yĩxũ i nawa idex-
axũ rü éxna tama. Erü ñoma i naãnewa rü guxũwama
nangẽxma i muxũma i idoratèxgũxũ i nügü ixugũxũ
na Tupanaãrũ orearü uruũgü yixĩgũxũ. ² Rü tá pemaã
nũxũ chixu na ñuxãcü tá nũxũ pecuáxũ na texé tiixũ
ya yíxema aixcũma Tupanaãẽ tũmawa ngẽxmaxẽ. Rü
dücax, guxũma i orearü uruũgü i nũxũ ixugũxũ na Tupana
duũxũxũ yaxĩxèxũ ya Ngechuchu ya Cristu, rü ngẽma
nixĩ i aixcũma Tupanaãẽ nawa idexaxũ. ³ Natürü guxũma
i ngẽma orearü uruũgü i tama nũxũ ixugũxũ na Tupana
duũxũxũ yaxĩxèxũ ga Ngechuchu, rü ngẽma rü tama
nũxũ nangẽxma i Tupanaãẽ i Üünexũ. Natürü Cristuarü
uwanüãẽ nixĩ i nawa ngẽxmaxũ. Marü nũxũ pexĩnüẽ
na ínanguxchaũxũ i Cristuarü uwanü, natürü ñuxma rü
marü ñoma i naãnewa nangẽxma. ⁴ Pa Chauacügũx,
pema rü Tupanaxãcügü pixĩgü. Rü marü nũxũ perüyexera
i ngẽma tama aixcũma Tupanaãrũ orearü uruũgü ixĩgũxũ.
Erü ngẽma Tupanaãẽ i Üünexũ i peãewa ngẽxmaxũ rü
nũxũ narüyexera i ngẽma Cristuarü uwanüãẽ i ñoma
i naãnecũãxgũwa ngẽxmaxũ. ⁵ Rü nüma i Cristuarü

uwanüärü duũxũgü rü ñoma i nañecũãxgü nixĩ. Rü ngẽmacèx ñoma i nañechigagu nidexagü. Rü ñoma i nañecũãx i duũxũgü rü nüxũ inarüxĩnũ. ⁶ Natürü i yixema rü Tupanaxãcügü tixĩgü. Rü yíxema Tupanaxũ cuáxe rü tüxũ itarüxĩnü. Natürü yíxema tama Tupanaxũ cuáxe rü tama tüxũ itarüxĩnü. Rü ngẽmawa nüxũ tacuèxgü na texé tixĩgüxũ ya aixcüma Tupanaärü duũxũgü ixĩgüxe rü texé tixĩgüxũ ya Cristuarü uwanüärü duũxũgü ixĩgüxe.

Tupana tüxũ nangechaũ

⁷ Pa Chaueneëgü ya Pexũ Changechaũgüxex, name nixĩ na yigü ingechaũgüxũ, erü Tupana nixĩ ya tüxũ ngüexëècü na yigü ingechaũgüxũ. Rü guxãma ya yíxema tümaëneëxũ ngechaũxë rü Tupanaxãcü tixĩgü rü Tupanaxũ tacuèx. ⁸ Yíxema tama tümaëneëxũ ngechaũxë rü tama Tupanaxũ tacuèx, erü Tupana nixĩ ya tüxũ ngüexëècü na yigü ingechaũgüxũ. ⁹ Tupana rü ñoma ga nañewa nanamu ga Nane ya nügümaã wüxicacü na yimagagu tüxũ nangẽxmaxũcèx i maxũ i taguma gúxũ. Rü yemawa Tupana tüxũ nüxũ nadauxëë na ñuxãcü tüxũ nangechaũxũ. ¹⁰ Rü woo Tupanaxũ tangechaũgü, natürü ngẽma ngechaũ i guxũärü yexera ixĩxũ nixĩ na nüma tüxũ nangechaũxũ rü ñoma ga nañewa na namuãxũ ga Nane na taxcèx nayuxüçèx rü naxütanüãxüçèx ga tórü pecadugü. ¹¹ Pa Chaueneëgü ya Pexũ Changechaũgüxex, yexguma yemaãcü tüxũ nangechaũgu ga Tupana, rü ngẽmacèx name nixĩ i yixema rü ta yigü tangechaũgü. ¹² Taguma texé Tupanaxũ tadau. Natürü ngẽxguma aixcüma yigü ingechaũgügu, rü Tupana rü tawa namaxũ rü norü ngechaũ rü aixcümaxüchi tórü maxüwa nangox.

¹³ Rũ nũma rũ marũ tũxna nanamu ga Naãẽ i Üünexũ. Rũ ngẽmawa nũxũ tacuèx na aixcũma norũ duũxũgũ ixĩgũxũ rũ nũma rũ tawa na namaxũxũ. ¹⁴ Rũ tomatama nũxũ tadaugũ rũ nũxũ tixuchigagũ na Tanatũ ya Tupana nũma namuxũ ga Nane na guxũma i duũxũgũxũ namaxẽxẽxũcèx. ¹⁵ Rũ yĩxema yaxóxẽ rũ nũxũ ixuchigaxe na Tupana Nane yĩxũ ya Ngechuchu, rũ aixcũma Tupanaãrũ duũxũ tixĩ, rũ Tupana rũ tũmawa namaxũ. ¹⁶ Rũ yixema nũxũ tacuèxgũ rũ tayaxõgũ na Tupana rũ poraãcũ tũxũ nangechaũxũ, erũ nũma nixĩ i aixcũma guxãxũ nangechaũxũ. Rũ yĩxema aixcũma tũmaẽneẽxũ ngechaũxẽ, rũ Tupanaãrũ duũxũ tixĩ, rũ nũma ya Tupana rũ aixcũma tũmawa namaxũ. ¹⁷ Rũ ngẽxguma aixcũma Tupanaxũ ingechaũgũgu, rũ tórũ maxũwa nangox i ngẽma, rũ tãũtãma nũxũ tamuũẽ i ngẽma ngunexũ i nagu tũxũ yacagũxũgu naxcèx i tórũ maxũ. Erũ woo ñoma i naãnewa tangẽxmagũ, natürũ napéxewa rũ Cristurũ tixĩgũ. ¹⁸ Rũ ngẽxguma aixcũma Tupanaxũ ingechaũgũgu, rũ nũxũ tacuèx na tãũtãma tũxũ napoxcuexũ, rũ ngẽmacèx taxucèxma nũxũ tamuũẽ. Natürũ ngẽxguma chi nũxũ imuũẽgu, rũ nũxũ tacuèx na tama aixcũma nũxũ ingechaũgũxũ. ¹⁹ Rũ yixema rũ Tupanaxũ tangechaũgũ, yerũ nũxĩra tũxũ nangechaũ ga nũmax. ²⁰ Ngẽxguma chi texé:

“Choma rũ Tupanaxũ changechaũ”, ñagũgu, natürũ tũmaẽneẽchi taxaixgu, rũ tidora. Erũ ngẽxguma tama nũxũ tangechaũgu i tũmaẽneẽ i nũxũ tadauxũ ¿rũ ñuxũcürũwa tá nũxũ tangechaũ ya Tupana ya tama nũxũ tadaucũ? ²¹ Rũ Ngechuchu ya Cristu tũxũ namu rũ ñanagürũ:

“Yíxema Tupanaxũ ngechaũxẽ, rü name nixĩ na tũmaẽneẽxũ rü ta tangechaũxũ”, ñanagürü.

5

Nüxũ tarüyexera i ñoma i naãneãrũ ngúchaũgü

¹ Ngechuchu rü Tupana Nane ya Cristu nixĩ. Rü guxãma ya yíxema nüxũ yaxóxẽ, rü Tupanaxãcü tixĩgü. Rü yíxema Tanatü ya Tupanaxũ ngechaũxẽ, rü nüxũ tangechaũ ta i guxũma i naxãcügü. ² Rü ngëxguma Tupanaxũ ingechaũgügu rü naxũxgu i ngẽma nüma tüxũ namuxũ, rü nüxũ tacuèx na aixcüma nüxũ ingechaũgüxũ i ngẽma naxãcügü ixĩgüxũ. ³ Rü ngëxguma aixcüma Tupanaxũ ingechaũgügu rü naga taxĩnüë i ngẽma tüxũ namuxũ. Rü ngẽma tüxũ namuxũ rü tama naguxcha na naga ixĩnüëxũ. ⁴ Erü guxãma ya aixcüma Tupanaxãcü ixixẽ, rü tama ñoma i naãneãrũ ngúchaũ i chixexũgu tarüxĩnü. Rü yixema rü tayaxõgü, rü ngẽmacèx tama name i ñoma i naãneãrũ ngúchaũ i chixexũgu tarüxĩnüë. ⁵ Rü yíxema yaxóxẽ na Tupana Nane yĩxũ ya Ngechuchu, rü yíxema tixĩ ya tama ñoma i naãneãrũ ngúchaũ i chixexũgu rüxĩnüxẽ.

Ore i Tupana Nanechiga

⁶ Rü nüxũ tacuèx na aixcüma Tupana Nane yĩxũ ya Ngechuchu. Yerü yexguma ñoma ga naãnewa nayexmagu rü dexáwa ínabaiegu, rü nümatama ga Tupana nüxũ nixu na Nanexũchi yĩxũ. Rü yexguma curuchagu nayuxgu rü nagü inabaãgu ga Ngechuchu, rü Tupana rü wenaxãrũ inanawéx na aixcüma Nane na yĩxũ. Rü ngëxgumarüü ta i ngẽma Naãë i Üünexũ i taguma idoraxũ, rü tüxũ nüxũ nacuèxẽ na aixcümaxũchi Tupana Nane na yĩxũ.

⁷ Rü ngẽmaãcü tüxú nangẽxma i tomaẽxpüx i cuèxruũgü i tüxú nüxü cuèxẽxü na aixcüma Tupana Nane yĩxü ya Ngechuchu. ⁸ Rü ngẽma norü wüxi nixĩ i Naã i Üünexü, rü ngẽma norü taxre nixĩ ga yema Tupanaga ga yexguma Ngechuchu dexáwa íbaiegu, rü ngẽma norü tomaẽxpüx nixĩ ga yema Tupana üxü ga yexguma curuchagu nagü inabaãgu ga Ngechuchu. Rü guxüma i ngẽma tomaẽxpüx, rü wüxigu nüxü nixu na aixcüma Tupana Nane yĩxü ya Ngechuchu. ⁹ Nüxü tayaxõgü i duüxügü ega tacüxü tamaã yaxugügu. Natürü Tupanaãrü ore nixĩ i yexeraãcü aixcümaxüchi ixixü. Rü Tupana nixĩ ya tamaã nüxü ixücü na Ngechuchu rü Nane yĩxü. ¹⁰ Rü yíxema nüxü yaxóxẽ ya Tupana Nane rü nüxü tacuèx na aixcüma yĩxü i ngẽma ore i Tupana nüxü ixuxü i Nanechiga. Natürü yíxema tama Tupanaãxü yaxóxẽ rü doratèx nüxü tawogü ya Tupana erü tama tayaxõ i ngẽma ore i Tupana nüxü ixuxü i Nanechiga. ¹¹ Rü ñaã nixĩ i norü ore ya Tupana i tamaã nüxü yaxuxü, rü ñanagürü:

“Chomatama marü pexna chanaxã i maxü i taguma gúxü.

Rü ñaã maxü rü Chaunegagu pexü nangẽxma”, ñanagürü. ¹² Yíxema nüxü yaxóxẽ ya Tupana Nane rü tüxü nangẽxma i ngẽma maxü i taguma gúxü. Natürü yíxema tama nüxü yaxóxẽ ya yima Tupana Nane rü tama tüxü nangẽxma i ngẽma maxü.

Cuáü rü ñuxre ga norü ucuxẽmaã inayacuèxẽẽ ga norü popera

¹³ Pa Chaueneẽgüx ya Tupana Naneãxü Yaxõgüxex, pexcèx chanaxümatü i ñaã ore na nüxü pecuáxücèx na pexü nangẽxmaxü i ngẽma maxü i taguma gúxü. ¹⁴ Rü

ngẽmacèx tama taxãneẽ na nüxna ingaicamagüxü ya Tupana. Rü nüxü tacuèxgü ega tacücèx nüxna icaxgu, rü nüma tüxü naxĩnü i ngëxguma norü ngúchaü yixĩgu i ngẽma naxcèx nüxna icaxü. ¹⁵ Rü ngëxguma nüxü icuèxgu na nüma tüxü naxĩnüxü i ngëxguma tacücèx nüxna icaxgu, rü nüxü tacuèx ta na tüxna naxãaxü i ngẽma naxcèx nüxna icaxü. ¹⁶ Rü ngëxguma chi texé nüxü dèuxgu i tümaẽneẽ na pecadu naxüxü, rü name nixĩ na naxcèx tayumüxexü ega tama pecadu i iyanatauxëxü yixĩgu. Rü Tupana tá nanamaxëẽ i ngẽma tümaẽneẽ ega tama pecadu i iyanatauxëxü yixĩgu. Nangëxma i pecadu i tüxü iyarütauxëxü. Rü ngëxguma ngẽma pecaduwe naxüãmagu i wüxi i peeneẽ, rü tama pemaã nüxü chixu na naxcèx peyumüxëgüxü. ¹⁷ Guxüma i chixexü i ixüxü, rü pecadu nixĩ. Natürü nangëxma i pecadu i tama tüxü iyarütauxëxü. ¹⁸ Rü nüxü tacuèx, rü yixema Tupanaxãcü ixixë, rü tama pecadu taxüecha, erü nüma ya Tupana Nane rü tüxna nadau. Rü taxuacüma tüxna nangaicama i ngoxo i Chataná i tüxü pecaduãxëëchaüxü. ¹⁹ Nüxü tacuèxgü na Tupanaxãcügü ixigüxü, natürü guxüma i ñoma i naãnecüãx rü ngoxo i ChatanáMéxëwa nangëxmagü. ²⁰ Rü nüxü tacuèx ta na ñoma ga naãnewa nanguxü ga Tupana Nane, rü tüxna nanaxã ga cuèx na nüxü icuèxgüxücèx ya yima aixcümáxüchi Tupana ixícü. Rü norü duüxügü tixigü ya yima aixcümáxüchi Tupana ixícü, erü Nane ya Ngechuchu ya Cristuarü duüxügü tixigü. Rü nüma ya Tupana Nane nixĩ i aixcümáxüchi Tupana yixü rü tüxna naxãaxü i maxü i taguma gúxü. ²¹ Pa Chauzacügüx, ¡Pegüna pedaugü na tama nüxü peyaxögüxücèx i tupanachicügü! Rü

1 CUÁŨ 5:21

15

1 CUÁŨ 5:21

ngẽxĩcatama nixĩ i chorü ore i pemaã nüxũ chixuxũ.

Rü nuãma pexna,

Cuáũ

Tupanaarü Ore i Tóriu Cori ya Ngechuchu ya Cristuchiga
New Testament in Ticuna (PE:tca:Ticuna)

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective

copyright owners.

2014-04-30

PDF generated using Haiola and XeLaTeX on 14 Jun 2022 from source files dated 28 May 2022

9d5dc22a-30be-5d26-85a9-76047f4c89e6